

bonitatis agnovisse Hilarius & ipse videtur, dum Tractat. in Psalm. LXVII. num. 4. scribit: *Æqua judicii Cælestis & iusta moderatio est, ut Peccatores Morte conficere, ita & JUSTOS LETITIA MUNERARI.* Rursus ne Martyres quidem Burnetus Cælo dignatur. Gloriosas quoque & triumphales istorum Animas, universa antiquitate reclamante, expectare jubet certaminis Coronam a postremo Christi Adventu. Ejusmodi commentum Hilarius dejicit, dum Tractat. in Psalm. LXV. num. 10. illorum Animas Igne temporalium tormentorum purgatas & defæcatas ad refrigerium eternæ Beatitudinis continuo perducit. Transivimus, inquit, per ignem & aquam. Gloriosas videlicet Martyrum mortes commemorat. Et eduxisti nos in Refrigerium. Hujus refrigerii & in loco alio meminit, dicens: *Convertere Anima mea in Requiem tuam, quia Dominus benefecit mihi. Bene placebo Domino in regione vivorum. Animam videlicet suam in Requiem beatæ illius Resurrectionis (quo nomine, ut supra diximus, significatur etiam Justorum ingressus in Cælum) hortatus, in qua Post Mortis Hujus Tempus, omni humanarum calamitatum labe deterfa, non doletur, non fletur, non peccatur, sed vivitur. In hujus igitur Beatitudinis per Ignem & Aquam Refrigerium Educti sunt.* Stephanum quoque Protomartyrem illuc fuisse deductum, sat ipse significat Tractat. in Psalm. LVII. num. 6. Et heic igitur ab Hilario Burneti cogitationes improbantur. Ubi vero dederis, Martyribus ex hac Vita decedentibus patere Cælum, nihil (uti supra ostendimus Theoremate Secundo) ultra exigitur, ut jure statuas reliquorum quoque Justorum Spiritus purgatos illuc invehit, ibique Requiem beatissimam nancisci. Negat insuper Burnetus peculiare & occultum Dei Judicium in singulorum hominum morte a Catholicis deprædicatum. Neque animadvertit, Hilarium in hoc etiam sibi adversari, & nobiscum sentire. Ipsum audi Tractat. in Psalm. LVII. num. 7. *Utique est Deus judicans eos in terra. Dicens ergo homo, an fructus sit Justo, non ambigitur expectare Judicium, Justo tamen jam in terris, quia per Angelos in Abrabæ sinum deductus sit, Judicato.* Deinde Infidelem diserte pronuntiat jam Judicatum ad Pœnam. Si Justorum quoque post mortem Judicium instituitur, ergo & Præmium pone sequatur oportet. Tertio, quod plus est, quanquam S. Hilarius *Sinu in Abrabæ* excipiendis ante Corporum Resurrectionem Justorum Animabus destinatum crediderit; immo Locum illum non semel a Regno Cælesti distinguat, in quod recepto Corpore electi introducentur: nihilo tamen secius is quam longissime abest hac etiam in re a somniis Burneti. Sed quia lux ab eo petenda poterit usui esse ad illustranda etiam ambigua aliorum aliquot Patrum verba de statu Mortuorum, in subsequens Capitulum materiem hanc rejiciendam duxi.